

佛說發菩提心破諸魔經
佛說聖佛母般若波羅蜜多經

宋西天三藏朝奉大夫試光祿卿傳法大師施護奉詔譯



清刻龍藏佛說法變相圖

二經同卷

佛說發菩提心破諸魔經_{上下卷}
佛說聖佛母般若波羅蜜多經

薄七

佛說發菩提心破諸魔經卷上_{第七}

宋西天三藏朝奉大夫試光祿卿傳法大師施護奉詔譯

如是我聞一時佛在王舍城迦蘭陀竹林精舍與大苾芻眾千二百五十人俱并諸菩薩摩訶薩眾而共集會是時王舍大城有迦葉氏大婆羅門住在彼城而忽一時於夜夢中見此閻浮提世界有其千葉廣大蓮華七寶莊嚴清淨可愛而彼華中有大月輪潔白圓滿周而光明熾盛照耀彼婆羅門於其夢中得見是相心大歡喜適悅慶快從夢覺已作

是思惟我聞沙門瞿曇是大智者諸有智人
無能過上善巧方便大慧具足我宜往彼請
問其相時婆羅門作是念已過於夜分至明
旦時詣迦蘭陀竹林精舍佛世尊所到已頭
面禮世尊足合掌恭敬如夢所見具以白佛
爾時世尊告婆羅門言如汝所夢是吉祥相
婆羅門汝今當知若人夢中見四種相者皆
是最上吉祥勝相何等爲四一者白蓮華二
者白傘蓋三者月輪四者佛像若見如是四
種相者當知必得最上大利爾時世尊欲重
宣此義而說偈曰

夢中若見蓮華相 及白傘蓋皆吉祥
或見清淨大月輪 夢者當獲最上利
又復若見佛形像 是相最上中最勝
斯人一切所愛敬 當能成就諸功德

爾時婆羅門復白佛言世尊何等名爲最上
大利佛以何緣作如是說爾時世尊即以伽
陀答婆羅門曰

我今爲說彼大利 汝婆羅門當諦聽
若人能發菩提心 成二足尊名大利
轉輪聖王位尊勝^{薄七} 統四大洲而自在^二
若有衆生樂成就 應當發起菩提心
帝釋天主勝福報 三十三天中自在
若有衆生樂成就 應當發起菩提心
欲色無色三界中 彼彼福報皆增勝
若有衆生樂成就 應當發起菩提心
所有衆生界無邊 如其所應善化度
若有廣爲利樂者 應當發起菩提心
世間所有大醫王 普能療治一切病
若有衆生樂成就 應當發起菩提心

作大光明現世間	一切暗冥皆照耀
若有衆生樂成就	應當發起菩提心
雖復生於三界中	斷除一切顛倒行
若有衆生樂出離	應當發起菩提心
所有煩惱等諸障	及除一切不善法
若有衆生樂除斷	應當發起菩提心
所有三界諸結使	隨所造作爲魔攝
若有衆生樂除斷	應當發起菩提心
若能調伏於無明	一切愛網悉能斷
諸有衆生樂出離	應當發起菩提心
彼貪愛法若斷除	一切垢染皆清淨
若有衆生樂出離	應當發起菩提心
所生族氏及色力	愚人恃彼生憍倨
若有衆生樂除斷	應當發起菩提心
愚執我見壽者見	於自善利生憍倨

若有衆生樂除斷	應當發起菩提心
於諸色法生憍倨	從染愛生過失大
若有衆生樂除斷	應當發起菩提心
多聞持戒及修行	愚人恃以生憍倨
若有衆生樂除斷	應當發起菩提心
住阿蘭若行乞食	於如是事生憍倨
若有衆生樂除斷	應當發起菩提心
應供自在具神通	恃已尊勝生憍倨
若有衆生樂除斷	應當發起菩提心
愚癡執著我人相	恃彼我相生憍倨
若有衆生樂除斷	應當發起菩提心
現在未來佛世尊	尊重恭敬而獲福
若有衆生樂斯利	應當發起菩提心
諸佛出興於世間	轉大法輪普化度
若有衆生樂聽受	應當發起菩提心

一切惡法斷所斷 一切善法修所修
若有衆生樂成就 應當發起菩提心
諸修道者修梵行 由是得證無漏道
若有衆生樂成就 應當發起菩提心
我所宣說無常法 各各於身自觀察
若有衆生樂了知 應當發起菩提心
我說有漏行皆苦 智者見苦而生厭
若有衆生樂出離 應當發起菩提心
我爲有情廣宣說 當知一切法無我
若有衆生樂通達 應當發起菩提心
宣說涅槃寂靜法 證悟無上大菩提
若有衆生樂成就 應當發起菩提心
我所稱讚菩提心 汝婆羅門恭敬聞
如聞深信能發心 乃名修行菩提者
爾時婆羅門聞佛宣說是伽陀已即白佛言

世尊若有人發菩提心者是人當得幾數福
蘊爾時世尊復以伽陀答婆羅門曰

正使一切衆生類 普集此佛世界中
一一修持淨戒行 悉能安住戒學地
而彼福蘊量無邊 於諸福中爲最上
若人能發菩提心 十六分中不及一
正使一切衆生類 普集此佛世界中
一一發生淨信心 悉能安住信行地
而彼福蘊量無邊 於諸福中爲最上
若人能發菩提心 十六分中不及一
正使一切衆生類 普集此佛世界中
一一修習妙法門 悉能安住法行地
而彼福蘊量無邊 於諸福中爲最上
若人能發菩提心 十六分中不及一
正使一切衆生類 普集此佛世界中

廣修須陀洹行法 悉住須陀洹果位
而彼福蘊量無邊 於諸福中爲最上
若人能發菩提心 十六分中不及一
正使一切衆生類 普集此佛世界中
廣修斯陀舍行法 悉住斯陀舍果位
而彼福蘊量無邊 於諸福中爲最上
若人能發菩提心 十六分中不及一
正使一切衆生類 普集此佛世界中
廣修阿那舍行法 悉住阿那舍果位
而彼福蘊量無邊 於諸福中爲最上
若人能發菩提心 十六分中不及一
正使一切衆生類 普集此佛世界中
廣修阿羅漢行法 悉住阿羅漢果位
而彼福蘊量無邊 於諸福中爲最上
若人能發菩提心 十六分中不及一

若人於此佛世界 廣集上妙梅檀香
造佛塔寺勝莊嚴 高廣等彼須彌量
如是福蘊亦無邊 於諸福中爲最上
若人能發菩提心 十六分中不及一
又若造立諸佛塔 如其分量所應作
隨所作已廣莊嚴 是諸衆生勝果報
而彼福利廣無邊 於諸福中爲最上
若人能發菩提心 十六分中不及一
又若一切衆生類 假使住壽滿一劫
以諸樂具施衆生 隨衆生意使圓滿
如是福蘊量無邊 於諸福中爲最上
若人能發菩提心 十六分中不及一
我所宣說如是等 一一皆爲最上法
若有衆生忻樂者 當求菩提寂靜果
住是果者得大利 無比無等最尊勝

是故若人聞此法 應當尊重正慧行

廣修如是福蘊者 速證無上大菩提

爾時婆羅門聞佛世尊如是稱讚菩提心已
即白佛言世尊我於菩提心中無少法可轉
佛告婆羅門言如是如是婆羅門若人發菩
提心者實無法可轉何以故婆羅門當知菩
提有其三種何等爲三所謂聲聞菩提緣覺
菩提無上菩提此中何名聲聞菩提婆羅門
謂若有人雖發菩提心但樂自利不樂利他
於利他心不能發起不能修持不能趣入不
能安住於此經法不樂聽受亦復不能爲他
宣說於後生中而不受身斷去來想亦不能
得平等正智於現生中樂求解脫婆羅門以
是義故名爲聲聞菩提又復何名緣覺菩提
謂若有人雖發菩提心於大乘法不樂修習

而不記念亦復自利趣求果證不樂利他於
利他心不能修持不能趣入不能安住於此
經法不樂聽受亦不爲他宣說教示不能安
住平等正智但起心念觀諸緣法隨所觀察
而得解脫婆羅門以是義故名爲緣覺菩提
又復何名無上菩提薄七謂若有人自能發生阿
耨多羅三藐三菩提心已復勸他人發如是
心於此經法自所聽受修習記念復爲他人
廣說其義於輪迴身不生厭倦樂欲利樂一
切衆生住平等智自解脫已欲令一切衆生
皆得解脫自利利他得安隱樂以已善利普
施一切天人大衆婆羅門以是義故名爲無
上菩提修是行者名爲菩薩乘人婆羅門汝
今當知佛語諦誠無有虛妄如我所說阿耨
多羅三藐三菩提心是最上義若離此大菩

提心而發聲聞緣覺心者不能利他終不得至大涅槃界何以故而彼聲聞緣覺自所利已不復生起利他勝行以是緣故不能具足諸佛法分雖發菩提心而自謂解脫彼菩提心亦不能得利他果報婆羅門若人能發阿耨多羅三藐三菩提心者於自於他皆悉平等以自所利歡喜布施即以此心普攝世間一切衆生乃爲世間最上大利亦名世間善調御者如是即能住平等智最上最勝不可思議婆羅門此即名爲大菩提心汝當如是如實了知爾時婆羅門白佛言世尊佛說解脫云何有其種種相耶佛言婆羅門聲聞緣覺如來解脫無種種相婆羅門譬如有人乘三種獸欲詣寶所雖所履道隨有差別彼所向處而無有異其三獸者謂驢馬象彼驢乘

者力勢羸劣由此因緣是人雖至寶所不能以其珍寶廣施衆生但樂自利取證涅槃彼馬乘者輕利快捷由彼力故是人雖至寶所亦復不能以其珍寶廣施衆生但與衆生作淨福田彼象乘者行步平正勇健多力由彼力故是人得至一切寶聚廣大城中至彼城已即作是念三乘珍寶皆於此出我當以此無量珍寶普施無邊一切衆生廣爲衆生作大利樂婆羅門三乘行人修三乘法亦復如是彼驢乘者即聲聞乘彼馬乘者即緣覺乘彼象乘者即是大乘汝今當知彼三乘道雖種種相所證涅槃所得解脫無種種相亦無差別婆羅門又如世間有三士夫俱欲過渡一深大河彼第一人依一小葉浮水而渡彼第二人而勝於前依其板木浮水而渡彼第

三人又復勝前乘以大船與多人衆安隱而渡得至彼岸此復猶如世間長子使其父母無所防護於一切處離諸憂惱婆羅門彼第一人依葉而渡者當知即是聲聞乘人彼第二人依其板木而得渡者當知即是緣覺乘人彼第三人乘船得渡者當知即是菩薩乘人自所得度復度他人婆羅門是故當知彼三乘人所修行法雖種種相而聲聞緣覺及彼如來所證涅槃無種種相爾時世尊欲重宣此義而說偈曰

三乘證涅槃薄十 同一涅槃法 證道雖差別
涅槃無二相 三世一切佛 得最上解脫
如是等法眼 正覺尊所說 是最上法智
出生諸方便 諸有修行者 應當如是學
佛說發菩提心破諸魔經卷上

佛說發菩提心破諸魔經卷下

宋西天三藏朝奉大夫試光祿卿傳法大師施護奉詔譯

爾時大婆羅門白佛言世尊諸修大乘法者當行何行佛告婆羅門言如我今說當如是行婆羅門汝今當知若有修大乘法者自發阿耨多羅三藐三菩提心已復勸他人發如是心於此經法廣爲他人宣說教示如是等人應當親近尊重恭敬是人以四攝法普攝衆生何等爲四所謂布施愛語利行同事此中何名布施所謂於財施中若少若多隨其自力起廣大心以此所施攝彼慳貪如是名爲修大乘者布施所攝何名愛語所謂於一切處見諸衆生應當面自熙怡語言柔順以諸方便安慰善來以此愛語攝彼麤惡如是名爲修大乘者愛語所攝何名利行所謂見

諸善法晝夜勤作於諸衆生起慈愍心以生淨信攝諸無信以持淨戒攝諸毀禁於一切處常樂利益如是名爲修大乘者利行所攝何名同事所謂於一切處先同其事復以方便教令精進堅固菩提諸有智者於如是法當如是行如是行者是爲菩薩所修正行若如是勇猛乃名最勝得到彼岸悉能通達最上法門如是名爲修大乘者同事所攝爾時婆羅門白佛言世尊諸菩薩摩訶薩依何而住乃能得成二足尊果住有幾種願佛世尊廣爲宣說所有住法如是說者即同宣說菩提法門最上希有佛告婆羅門言汝今當知住有三種所謂天住梵住聖住此中何名天住所謂但修慈行若人先於東方身業行慈語業行慈意業行慈廣大熾盛南西北方四

薄七

十

維上下亦復如是身業行慈語業行慈意業
行慈廣大熾盛此說名為天住何名梵住所
謂修四無量行何等為四謂慈悲喜捨此說
名為梵住何名聖住所謂修三解脫門何等
為三所謂空無相無願此說名為聖住菩薩
摩訶薩當依如是聖住中住爾時世尊欲重
宣此義說伽陀曰

我所說三住 是勇猛勝法 為諸菩薩眾
隨所應宣說 若於一切時 如說而能行
我當稱讚彼 是求菩提者 天住及梵住
聖住亦復然 於此三住中 隨應而安住
若如是住者 當得無滅句
爾時婆羅門白佛言世尊菩提法門其義云
何未來世中若有眾生問我此義我無智慧
所有佛法不能通達我於爾時當云何答願

薄七

十一

佛世尊廣為我說爾時世尊為婆羅門說伽
陀曰

婆羅門當知	我所為汝說	此廣大正法
勸發菩提心	諸無智慧者	由此而獲得
若了此法門	是即菩提義	此所說正法
勸發菩提心	隨眾生所問	一一能開示
此所說正法	勸發菩提心	邪見諸疑惑
一切皆能斷	於後末世中	若有人得此
正法墮手者	是人若布施	謂廣大財等
即圓滿施行	由施成就故	得到於彼岸
又復末世中	若有人得此	正法墮手者
是人若持戒	清淨而無缺	即圓滿戒行
由戒成就故	得到於彼岸	又復末世中
若有人得此	正法墮手者	是人若忍辱
安受諸煩惱	即圓滿忍行	由忍成就故

得到於彼岸 又復末世中 若有人得此
正法墮手者 是人若精進 勇猛而發起
即精進行圓 由精進成就 得到於彼岸
又復末世中 若有人得此 正法墮手者
是人若修定 住三摩呬多 即圓滿定行
由定成就故 得到於彼岸 又復末世中
若有人得此 正法墮手者 是人若修慧
解了最勝法 即圓滿勝慧 由慧成就故
得到於彼岸 又復末世中 若有人得此
正法墮手者 能尊重供養 當知如是人
名求菩提者 得近佛菩提 決定當成就
八十俱胝佛 加持此正法 若得墮手者
獲最上法聚 若現在佛前 聞此正法者
當知如是人 了知菩薩義 愛樂佛菩提
我知如是人 我見如是人 我念彼名字

薄七

十二

我及一切佛 亦共所稱讚 若人聞此法
不轉爲他說 彼生我慢心 造廣大過失
當知彼等人 不尊重正法
爾時婆羅門白佛言善哉世尊善說此法門
即是菩提義若人於現世中愛樂了知如是
義者是人不久於此世間得大勇猛未來世
中善說勝法安住菩提廣爲多人作大利益
佛言婆羅門汝今已能得正智慧能說如是
利益語言婆羅門若有人今於我前聞是法
已我涅槃後於末世中若能於此正法書持
讀誦者當知是人愛樂聖道發菩提心婆羅
門我於往昔求菩提時於一阿蘭若處遇一
苾芻宣說此法我當暫得聞是法時涕淚悲
泣即自思惟我宿世中以何業障於此正法
先不得聞作是念已即取搏食施彼苾芻後

復白言如所聞法我不能知我今樂聞願爲廣說時彼苾芻如其所應爲我宣說婆羅門我於爾時聞是法已即發願言願我當來以此正法於末世中加持護念廣爲衆生宣布演說婆羅門我時又念今此正法我於何時能爲衆生如應宣說後末世中諸衆生類少能於此愛樂修習後彼彼時此法在世佛不現前我於是事深主悲愍婆羅門我當作是念時有佛名無量光發如是言以願力故果報成就婆羅門以是義故我所悲愍一切衆生積集癡暗受輪迴怖後末世中有諸苾芻於此正法起厭離心毀壞禁戒作不律儀以是緣故不能宣通如是正法是故婆羅門我爲利益諸衆生故廣說此經汝應當知今此正法是廣大法門總攝四種阿舍何等爲四

薄七

十三

所謂雜阿舍長阿舍中阿舍增一阿舍如是等總攝一切聲聞藏法諸聲聞人若於是中修學者即爲聲聞藏而能出生聲聞乘果亦攝聲聞菩提分法又此經中攝彼一切最上所說菩薩藏法是故得名諸法之母所有毗柰耶藏阿毗達磨藏亦於此經攝乃至八萬四千法蘊一一皆從此經中出又此經法是一切智智最上根本而復出生聲聞緣覺之智廣大甚深不可思議是大光明普照三有此即從一切智根本出生諸佛菩提所有布施功德持戒忍辱精進禪定智慧及彼最勝解脫如是等衆功德藏悉於此經如理宣說又復苦集滅道四聖諦法而亦於此經中演說以要言之此經總說諸行無常諸法無我涅槃寂靜以是義故若聲聞乘若緣覺乘

若大乘法隨其所應是中廣說又此經者於諸法中廣大稱讚彼菩提心是故此經最上最勝婆羅門若有人現見諸佛親聞是法者當知是人已從先佛聞寶嚴經於彼經中已聞此法是故當知今此經法於三世中曾無

薄七

十四

斷絕彼彼衆生隨應得聞爾時婆羅門白佛言希有世尊佛所說法最上甚深若諸無智衆生得聞如是無量功德藏最上正法不能深生愛樂心者是人於阿耨多羅三藐三菩提當以何緣而能成就又復世尊何因緣故多有衆生於此大乘最上法中心生疑惑佛言婆羅門汝今當知此三千大千世界中有百俱胝天魔宮殿百俱胝魔王一一各有百俱胝天魔眷屬常時於此最上法門伺求其便起諸難事不令衆生書持讀誦何以故此

三千大千世界中多有衆生取證阿羅漢果今得聞此大乘法門有善男子善女人發阿耨多羅三藐三菩提心者彼前功德稱量較計而不及此發菩提心是故天魔伺求難事魔爲難故多有衆生以此因緣心生疑惑婆羅門又復此經爲諸法中王以是緣故多諸難事爾時婆羅門白佛言世尊以何方便能令諸魔而自調伏佛言婆羅門我有秘密總持法門名曰破魔我若說此法門時所有一切魔及魔衆皆悉破壞婆羅門譬如日輪光明出照世間一切暗冥皆悉隱沒破魔法門亦復如是我若說時一切魔衆皆悉破壞時婆羅門白佛言世尊何等是秘密總持破魔法門願佛爲說佛告婆羅門言汝當諦聽破魔法門其名如是

薄七

十五

那謨引阿帝引多阿那引識多鉢囉合怛喻

二怛半合泥引毗藥一薩哩合沒提引

毗喻引二合婆誡訥毗藥三合怛軻切也他

引唄哩沒合那五娑摩哩沒合那六唄沒那

沒那七壹賀沒那八怛怛羅合沒那九你誡

摩十多邏四臘沒馱十一合怛怛囉合沒二十

怛嚕賀誡多三誡摩那致四摩四引耨娑摩

五訥訥六摩摩囉蘇珂七阿羅彌引多引伊

迦囉又八引十

世尊說是祕密總持破魔法門時一切魔宮

皆大震動一切魔王及諸魔衆皆悉驚怖戰

掉心生苦惱不能安坐咸作是念世尊爲一

切衆生悲愍利益令得安隱以慈悲喜捨饒

益衆生何故今時我等諸魔不爲饒益受斯

苦惱不能安坐復次婆羅門我今以是祕密

總持章句而加持此發菩提心大乘經典後

末世中於一切處說此經時不爲一切天龍

夜叉乾闥婆阿脩羅迦樓羅緊那羅摩睺羅

伽人非人等伺得其便宜通流布無諸難事

若有人書持讀誦此正法者是人遠離王難

賊難水火蟲獸一切難事何以故今此正法

最上祕密我爲悲愍利樂一切衆生故如是

宣說婆羅門佛常不離慈悲喜捨饒益衆生

若善男子善女人如所宣說如理修習者是

人當得三業善行滅除諸罪薄七於一切時離諸

苦惱婆羅門以是因緣汝應當知今此正法

能除一切苦能滅一切罪能破一切魔成就

一切法爾時世尊欲重宣此義說伽陀曰

魔於修善者 常伺求其便 欲起諸難事

破壞彼善法 若聞說此經 一句或一偈

彼諸惡魔衆 而悉自調伏 大驚怖戰掉
苦惱不安坐 由彼罪業因 獲果報如是
於一切衆生 常起惱害心 障諸善法故
彼因果無失 若人於此法 書持讀誦者
是人當遠離 王難及賊難 水火蟲獸等
諸難不能侵 乃至人非人 伺不得其便
身語心善行 斷除一切罪 於一切時中
不生諸苦惱 遠離諸魔事 不見諸魔相
及離諸煩惱 由持此經故 若聞此經已
如聞而善學 善解一切法 進趣於彼岸
若修此法者 通達菩薩行 從菩提道來
成就正等覺

佛說此經已迦葉氏大婆羅門及諸菩薩聲
聞世間天人阿脩羅乾闥婆等一切大衆聞
佛所說皆大歡喜信受奉行

薄七

十

佛說發菩提心破諸魔經卷下